

Il moviment pietistic ed ils herrnhuterans en il territori grischun

■ Il pietissem è in moviment religius protestant dal 18avel tschientaner che deva testimonianza dal basegn da s'aprofundar en maniera intima en la ductrina cristiana. El è sa derasà oravant tut da Halle sin basa da las ideas e scrittiras dad August Hermann Francke. En il Grischun existiva già il 1715 in circol d'aderents dals pietists da Halle che sa radunavan tranter auter a Cuira, Malans, Gianatsch ed Eigias; els frequentavan però era ils servetschs divins da la baselgia uffiziala. Enturn il 1737/38 han existì en il Grischun, ultra dals pietists, anc ils uschenumnads fenatists, ina secta che refusava ils sacraments dal batten e da la Sontga Tschaina, ch'instigava il pievel cunter ils plevons e ch'era sa separada da la baselgia uffiziala.

L'emprim moviment pietistic en il Grischun era per gronda part in moviment da laics. Dal 1714 fin il 1752 eran inscrits 49 Grischuns (laics e teologs) en la scola da Francke a Halle. La plipart dals laics derivava da famiglias prominentas sco ils Albertinis, Baviers, Buols, Capols, Gulers von Wyneck, Jenatschs, Otts, Pelizzaris, Perinis, Plantas, Salis-Grüsch, Schorsch, Schwarzs, Sprechers, Stampas e Tscharners. L'interess particular da questas famiglias per il pietissem provegniva per part da l'aboliziun dal Edict da Nantes (1685) e da la cumpassiuin cun ils ughenots exiliads, per part era dal servetsch militar prestà dals protestants grischuns en l'Olanda dapi il 1693. Il colonel Hercules Capol da Flem (*1642) aveva procurà a l'Olanda l'emprim regiment grischun. El e Christoffel Schmid von Grüneck da Glion, ses successur a la testa da quest regiment, avevan contacts cun circuls pietistics en l'Olanda. A Glion è alura sa furmà in circol da pietists particular. Divers teologs avevan studegià a Halle, per exempel tut ils trais decans dal 1724: Otto Nicolay, Jon Anosi Planta e Gi-on Caprez.


Dapli impurtanza ha cuntanschi il moviment religius fundà dal cont Nikolaus Ludwig von Zinzendorf a Herrnhut (Saxonia) enturn il 1750. Partind da l'idea dals frars da Herrnhut d'exercitar la devoziun era en communitads ordai la baselgia, ha Zinzendorf appellà al cumbat da la ductrina cristiana cunter il razionalissem. Sia communitad sa numnava «Brüdergemeine», da la quala Zinzendorf è daventà l'emprim uestg, suandà tranter auter da Johann Baptist von Albertini da la Punt-Chamues-ch (1814).

Ils emprims contacts grischuns cun la confraternitad aveva stabilì Daniel Willi, plevon a Cuira ch'è daventà enturn il 1741 l'exponent principal dal pietissem tardiv en il Grischun. Il 1749 eran ils plevons aderents dals herrnhuterans en la maiorità a la Sinoda da Glion, uschia che l'emprova dals adversaris da cuntanscher la condennaziun da la ductrina da Zinzendorf tras la Sinoda n'è betg reussida. Igl è naschi ina vasta litteratura ediftiganta pietistica ch'è stada spezialmain intensiva en l'intschess rumantsch. Da quella fan part per exempel ils «Psalms de David» (1762) da Valentin Nicolai, il «Zardin da l'orma fidel» (1711, 1764²) dad Ulrich Saluz, la «Musica spirituala da l'olma» (translaziun, 1749) da Conradin Riola (jun.) e las «Canzuns spirituaelas» (1765) da Gian Battista Frizzoni.

En ils onns 1770 hai dà en il Grischun grondas cuntraversas tranter ils aderents ed ils adversaris dal pietissem. La situaziun è sa calmada pir suenter ils conclus stipulads d'ina sessiun evangelica a l'occcasiun da la Dieta dal 1778, tenor ils quals nagin plevon na dastgava pli s'associar ad ina secta estra, inclus la cuminanza herrnhuterana che n'era betg pli tolerada en il Grischun. Cun l'infiltraziun da las ideas da la Revoluziun franzosa è tschessà era il moviment pietistic en il Grischun. *Martin Bundi*

Herrnhuterans

Unitad evangelica da fraters (*Unitas fratrum*), numnada en tudestg era Böhmsche u Mährische Brüder. Resortida il 1727



Titel da las «Canzuns spirituaelas» da Gian Battista Frizzoni, numnà er «Il cudesch da Schlarigna» (1765).

d'ina cuminanza da fugitivs religius da la Moravia che sa referivan al reformatur boemian Jan Hus. Quests fugitivs èn vegnids colonisads dal cont Nikolaus Ludwig von Zinzendorf en vischinanza da Görlitz (Saxonia). La colonia ha sviluppa in agen urden doctrinar che metteva en il center la fraternitad dals emprims cristians. A partir dal 1739 èn sa furmadas a Berna, Basilea, Aarau e Turitg uschenumnadas communitads da herrnhuterans.

Ils emprims contacts grischuns cun la cretta pietistica da Zinzendorf aveva stabilì probablmain il plevon Daniel Willi en ils onns 1720, intensivads a partir da ca. l'onn 1735. Sco emprim emissari da la colonia dals herrnhuterans è attestà a Cuira Johann Philipp Dörbaum (1745). Il teolog tudestg David Cranz è daventà enconuscent tras il rapport da sia missiun en il Grischun («Reise-Diarium und Relation von Pündten im Monat Junio, Julio und Augusto 1757»). Els herrnhuterans avevan lur aderenza en tut ils circuls socials evangelics e reformads. Il dumber approximativ da herrnhuterans domiciliads en il Grischun: 1753 385 (42 commembers da la Sinoda evangelica); 1778 249 (70 a Schlarigna, 34 a Claustra). En cumparegliazion cun auters chantuns era il Grischun il pli grond center da herrnhuterans en Svizra (ma senza communitad) ed entaifer il Grischun eran il Partenz (Claustra) e l'Engiadin'Ota (Schlarigna) ils domicils principals da quella cuminanza religiusa. Els herrnhuterans tgiravan ina pietad dal cor fitg sentimentala e sa cuntranavan per urar, chantar, assister a la pregia e leger lur revis-

ta, las «Gemeine Nachrichten». Els salvavan lur reuniuns da devoziun solitmain en chasas privatas, mintgatant cun separar ils umens (sut direziun spirituala d'in frater) e las dunnas (sut direziun spirituala d'ina sora).

Il 1758 è il plevon herrnhuteran Gian Battista Frizzoni vegni licencià da Buond en consequenza da sias activitads pietisticas, quai ch'ha chaschunà en la Sinoda evangelica durant quasi 30 onns conflicts e discordia tranter ils sinodals ortodoxs ed ils pietists herrnhuterans e provocà campagnas d'insultaziuns e diffamaziuns. Per finir ha la Dieta federala stui intermediar cun il «Parere» (1775). Quel ha alura excità pir da dretg las olmas ed il 1775 han las duas facziuns salvà la Sinoda en locals separads. Suenter la culminaziun dals conflicts il 1778 èn ins puspè sa calmà e cun la Sinoda da Buond dal 1784, ch'ha abolì l'engirament antiherrnhuteran per ils candidats a la Sinoda, han las cuntraversas prendì ina fin. Els vegls na pudevan betg pli ed ils giuvenns – influenzads dal spiert illuministic – na vulevan betg sa cumbatter vivanant. Enturn il 1830 vivevan mo pli paucs herrnhuterans en il Grischun (Signuradi e Partenz). Renumads herrnhuterans grischuns emigrads èn stads: Johannes Janett, Johann Baptista Cattaneo e Johann Baptist von Albertini. Il 1773 derivavan radund 10 % (25 persunas) dals abitants da Neuwied, citad en il Rheinland-Pfalz enconuscenta per sia toleranza religiusa, dal Grischun. A la fin dal 20avel tschientaner dumbravan ils herrnhuterans 350–400 commembers en Svizra. *Adolf Collenberg*

Hercules [Hercli] Capol

* 1642, † 1706, reformà, da Flem. Figl da Benedikt e da Dorothea nata Schmid von Grüneck, da Glion. Frar da Johann Gaudenz. ∞ Elsbeth nata Sprecher von Bernegg, da Luzein. Studi da medischina a Leiden, dr. med. 1665. Mastral da Flem, alura carriera militara, l'emprim en servetsch franzos. Il 1685 è Capol sa distanzia da la Frantscha causa las persecuziuns dals ughenots (revocaziun da l'Edict da Nantes) ed è entrà en servetsch spagnol a Milaun (fin il 1693), per daventar alura cumandant d'in regiment grischun en servetsch ollandais (fin a sia mort), nua ch'el ha cuntanschi il grad da brigadier il 1701. Capol è stà in defensur persvadi da l'idea reformada e da l'indipendenza ollandaisa. *Martin Bundi*

Christoffel Schmid von Grüneck [de Carniec]

* 14 da favrer 1671, † 1730, reformà, da Glion. Figl da Jakob e d'Anna nata Schorsch, da Spleia. ∞ 1708 Dorothea Caecilia nata Schmid von Grüneck. Emprima scolaziun tras magisters privats e plevons, alura scola superiura a Turitg. Viadis en l'Olanda ed a Paris. Gia il 1686 mastral da la Foppa en substituziun dal bab (mort en uffizi). Chancelier a Sunder 1689–91, podestat a Murbegn 1691–93. Litinent en servetsch ollandais (regiment da Hercules Capol) 1693. Suenter la mort da Capol (1706) colonel e possessur dal regiment, brigadier 1719, maior general 1726. Blessà il 1709 en la Guerra da Malplaquet en Flandra. Egitur d'ina charta da las Trais Lias (Amsterdam, 1716). Possessur da terren en la Val S. Giachen e cumproprietari da la fabrica da saida a Clavenna (1715). *Martin Bundi*

Daniel Willi

* 19 da matg 1696 a Cuira, † 24 da november 1755 a Cuira, reformà, da Cuira. Figl da Johann Simeon, maister da construcziun municipal, e da Maria nata Mathis. ∞ 1723 Anna nata Bavier, figlia da Johann Ulrich, antistes da Cuira. Studi da teologia, ordinà il 1720. Plevon a Maladers 1722–23, Tusaun 1723–33 e Cuira 1742–55, antistes a partir dal 1752. Il 1729 ha Willi fundà ina chasa d'orfens a Tusaun. En ils onns 1733–42 è el sa distanzia da la baselgia reformada, è s'occupà sco represchentant impurtant dal pietissem en las Trais Lias intensivamain dal separatissem ecclesiastic ed è s'engaschà en la baselgia a favur dals herrnhuterans. *J. Jürgen Seidel*

Johannes Caprez

≈ 6 da schaner 1701 a Trin, † 4 da settember 1777 a Glion, reformà, da Trin. Figl da Christian e dad Anna nata Domenig. ∞ Anna Emilia, figlia da Christoph Casutt. Studi da teologia a Cuira, ordinaziun e recepziun en la Sinoda retica 1720, alura scolast a Tusaun ed a Castelmur. Plevon a Castrisch 1723–29, Trin 1729–56 e Glion 1756–77, decan da la Lia Grischa a partir dal 1767. Defensur dals herrnhuterans en la Sinoda retica. *J. Jürgen Seidel*

Conradin Riola

* 1707 a Sent, † 17 da zercladur 1767 a Luven, reformà, da Sent. Figl da Conradin. Studi da teologia al Carolinam a Turitg, recepì en la Sinoda retica il 1732. Reverenda a Schnaus 1734–36, Sarn 1736–39, Frauenkirch 1739–44, Flond 1744–53, Sagogn 1753–58 e Luven 1758–67. Il 1749 ha Riola publitgà sia «Musica spirituala da l'olma» (segunda ediziun 1782) ed il 1756 in'ediziun cumpletada da quella per il diever a la celebrazion da la Sontga Tschaina e per tut las festas e tut ils firads; i sa tracta da l'emprima collecziun da canzuns cun notas per la Surselva. Il 1752 è cumpari ses stampat «Ilg bi fittament d'ilg ver penitent [...]», in entruidament per enconuscher sasez. *(red.)*

David Cranz

* 1723 a Naugard (Pomaranja), † 1777. Studi da teologia a Halle, pietist. Redactor da las «Gemein-Nachrichten», organ dals

herrnhuterans. Scrivant dal cont Nikolaus Ludwig von Zinzendorf, per incumbensa dal qual el ha fatg viadis d'infurmaziun e d'inspeziun. Il viadi en il Grischun ha el descrit en ses «Reise-Diarium und Relation von Pündten im Monat Junio, Julio und Augusto 1757». Sia analisa dat in'invista profunda en la situaziun religiusa dal Grischun reformà da quel temp ed en las relaziuns tranter ils pietists grischuns e Halle. *Adolf Collenberg*

Gian Battista Frizzoni [Fritschun]

* 27 d'avust 1727 a Schlarigna, † 29 da matg 1800 a Schlarigna, reformà, da Schlarigna. Figl da Giovanni Battista, reverenda, e da Maria nata Zuan, da Silvaplana. ∞ Barbla nata Danz, da Zuoz. Studi da teologia a Genova 1746–47 e Turitg 1747. Il 1748 è Frizzoni stà preceptur en la famiglia von Salis a Suogl, nua ch'el è entrà probablmain per l'emprima giada en contact cun il pietissem. Recepì en la Sinoda 1747, reverenda a Buond 1748–58. El è vegni licencià il 1758 en consequenza da sias activitads pietisticas ed è alura sa retratg sco reverenda en sia vischnanca natala, nua ch'el ha vivì fin a sia mort. Aтур d'ina professiun da la cretta evangelica («Compendio», 1776) e da dus cudeschs da chant: «Canzuns spirituaelas», 1765 (164 canzuns, numnà er «Il cudesch da Schlarigna») e «Testimonianza», 1789 (154 canzuns). *Manfred Gross*

Johannes Janett

* 17 d'avrigl 1729 a Tschlin, † 27 da favrer 1803 a Sebastianovka (Russia dal Sid), reformà, da Tschlin. ∞ Anna Katharina nata Reuter, da Kassel. Scolas a Tschlin, scolaziun supplementara tar ils plevons pietistics Jakob Valentin a Scuol e Johannes Roselius. Studi al Collegium Philosophicum a Cuira 1749–50 ed enconuschienscha cun il plevon Daniel Willi. Studi da teologia a Berna 1750–51. Plevon a Peist 1751–58. Temporarmain educatur privat tar las famiglia Planta/Zerne e Sprecher/Luzein, plevon a Zerne 1758–63. Il 1763 è Janett daventà commember da la confraternitad Neuwied a Koblenz (Rheinland). Il 1765 è el emigrà a Sebastianovka, nua ch'el ha surpiglià la pastoraziun da las colonias pietisticas a la Wolga. Janett è stà durant 38 onns l'emprim plevon reformà e de facto decan da las baselgias luteranas e reformadas en questa regiun ed ha intermedià tranter auter ils Grischuns Hartmann von Moos e Johann Baptist Cattani per il servetsch divin en las colonias a la Wolga. *Martin Bundi*

Johann Baptist von Albertini

* 17 da favrer 1769 a Neuwied (Rheinland), † 6 da december 1831 a Herrnhut (Saxonia), herrnhuteran, da La Punt-Chamuesch. Figl da Jakob Ulrich, chapitani austriac, e da Margareta nata von Planta-Wildenberg. ∞ Louise Friedrike Wilhelmine, figlia dal barun Friedrich von Rohwedel-Gnadenfrey. Scolas herrnhuteranas a Neuwied, Niesky (Saxonia) e Barby (Saxonia-Anhalt). Commiliton da Friedrich Schleiermacher. Scolast a Niesky (1788, al seminari da Niesky dapi il 1796) ed a Barby. Preditgant a Niesky 1804, consecrà là presbiteran il 1810; uestg dals moravs (fraters boemians) 1814, commember da la Conferenza unitara dals confrars seniors a Berthelsdorf (Saxonia), preses da quella dapi il 1824. Herrnhuteran impurtant, aтур da canzuns spirituales, interessà a la botanica. *J. Jürgen Seidel*

Lexicon Istorico Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istorico Svizzer; versiun online: www.e-lir.ch; versiun stampada: www.casanova.ch u en mintga libreria.